



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

კიკალეიშვილი ზურაბ მალაქიას ძე



ზ. კიკალეიშვილი

კიკალეიშვილი ზურაბ მალაქიას ძე (25. X. 1924 თბილისი, – 1. VI. 2005, იქვე), ბალეტის მოცეკვავე, ბალეტმაისტერი, პედაგოგი, ქორეოგრაფი. საქართველო. სახ. არტისტი (1955), სტალინური პრემიის ორგზის ლაურეატი (1948, 1951). დაამთავრა მოსკოვის ქორეოგრაფიის სასწავლებელი (ნ. ტარასოვის კლასი). 1942-იდან იყო თბილისის ქორეოგრაფიის სასწავლებლის პედაგოგი, ამავე წლიდან – თბილისის ოპერისა და ბალეტის სახელმწიფო თეატრის საბალეტო დასის სოლისტი.



ზ. კიკალეიშვილი.
დ. თორაძის ბალეტი
"გორდა".

კ-ის შემოქმედებისათვის დამახასიათებელია მკაფიო ინდივიდუალობა და თვითმყოფადობა, მაღალი ტექნიკა და შინაგანი არტისტიზმი. მისი ეს თვისებები შესანიშნავად გამოიკვეთა ვ. ჭაბუკიანის დადგმების შემდეგ პარტიებში: ჯარჯი (ა. ბალანჩივაძის „მთების გული“), ფრონდობო (ა. კრეინის „ლაურენსია“), დავრიში (გ. კილაძის „სინათლე“), გორდა, სოკოლოვი (დ. თორაძის „გორდა“ და „მშვიდობისათვის“) და სხვ. განსაკუთრებით აღსანიშნავია მის მიერ შესრულებული იაგოს როლი (ა. მაჭავარიანის „ოტელო“); სხვა პარტიები: პრინცი ალბერტი (ა. ადანის „ჟიზელი“),

ზიგფრიდი, დეზირე (პ. ჩაიკოვსკის „გედების ტბა“ და „მძინარე მზეთუნახავი“), ვაცლავი (ა. ასაფიევის „ბახჩისარაის შადრევანი“) და სხვ. აღსანიშნავია კ-ის, როგორც ბალეტმაისტერის მოღვაწეობა; მისი დადგმებია: რ. გლიერის „წითელი ყაყაჩო“ (1948), ბ. კვერნაძის „ქორეოგრაფიული ნოველები“ (1964, 1978 – სტოკჰოლმი) და სხვ. გადაღებულია მხატვრულ ფილმებში: „ქართული ბალეტის ოსტატები“ (რეჟ. შ. მანაგაძე, ვ. ჭაბუკიანი, 1961), „ოტელო“ (ა. მაჭავარიანის ბალეტის ეკრანიზაცია, 1960), „ვერის უბნის მელოდიები“ (1973, რეჟ. გ. შენგელაია), „აურზაური სალხინეთში“ (1975, რეჟ. ლ. ლოლობერიძე), „კავკასიური რომანსი“ (1975, რეჟ. რ. გაბრიაძე) და სხვ. როგორც ბალეტმაისტერ-რეპეტიტორი მოღვაწეობდა ქ. ტოკიოს „ტოკიო ბალეს“ (1967– 68) და ქ. სტოკჰოლმის სამეფო ბალეტის თეატრის დასებთან (1978– 79), თურქეთში საბალეტო დასის რეპეტიტორად (1983–84). თბილ. ოპერისა და ბალეტის საბალეტო დასთან ერთად გასტროლებით შემოიარა მსოფლიოს მრავალი ქვეყანა.

მიღებული აქვს ღირსების ორდენი (1996) და სხვა სახელმწ. ჯილდოები.
